

## De rasende Adventskronz

Omm letzde Freidaach hott mich de Schorsch oogerufe unn hott mich gefroocht, ob ich e kloo Kuchellaachersche hätt, er det oons brauche.

Ei ferr was donn?, habb ich enn gefroocht.

Dess verrot ich nitt, hotter ze Antwort gewwe, hosde e Laacher odder hosde koons?

Ich saach: Ich denk, ich habb oons, soll ich derrs vorbeibrenge?

Naa, hotter gesaat, ich holl merrs gleich ab, ich bin in fünf Minutte bei derr.

Ich bin in de Keller enunner, habb aach gleich die rischdisch Schublad vom Werkzeichschronk uffgezooche unn finn tatsächlich e Dittsche mett emm kloone Kuchellaacher droi, wer waaß wo ich dess her hadd. Ich nemm dess Dittsche, gieh die Kellertrepp enuff unn schunn hotts geklingelt, de Schorsch war onn de Hausdier.

Hosde su e Ding? frächder mich.

Ich saach: Hier im Dittsche.

Doo moont de Schorsch: Ich gebb derrs nooch Weihnachte widder. Heit middaach kimmsde mol bei mich, ich will derr was zeiche. Unn schunn warer fort, de Schorsch.

Middaachs bin ich zu emm hie unn er hott mich gleich in die Wohnstubb gefiehr.

Ess Kättche iss unnerweechs, hotter gesaat, die waaß noch garnitt was ich gemacht habb: Enn drehbare Adventskronz mett Solar-Ootrieb! Ich habb merr extra enn Bausatz mett Solarzelle kaaft, unn aach doi Kuchellaacher iss oigebaut. Guck der dess emol oo

Ich guck unn seh, dass er enn Adventskronz mett vier Wachskerze druff onn die Wohnstuwedeck gehängt hadd, unn newer dene vier Kerze hadder vier Solarzelle unn vier Probeller festgemacht. Von de Deck erunner kam so enn Holzstab, onn den hadder unne dess Kuchellaacher droogemacht, weil der Kronz sich joo drehe soll. Oo oonsich Kerz hott gebrennt, oo Solarzell hott Strom gewwe, oon Probeller iss geschnorrt unn hott gonz langsam den Kronz zum Drehe gebrocht.

Genial, habb ich gerufe, habb mich uff die Kautsch gesetzt unn habb nor geguckt.

Ja, genial, hott de Schorsch gesaat, doo druff misse merr ooner drinke, unn er iss enaus in die Kich, e Flasch Äbbelwoi ze holle. Beim Enausgieh hotters Deckelicht oogemacht unn weil doo so neimodische Lompe drin sinn, wars de erst noch duster in de Stubb.

Awwer wie die Lompe heller worrn sinn unn uff die Solarzelle geschiene hawwe, sinn alle vier Probeller gelaafe, hawwe sich immer schneller gedreht unn aach de Adventskronz iss immer schneller worrn, immer schneller unn schneller – er iss erum gerast unn ich konnt nor gucke, unn uff oomol sinn die Kerze fortgefloh – unn wie ich uffgesprunge bin unn dess Licht ausgemacht habb, wars schunn bassiert: Die brennend Kerz war in enn Deller mett Plätzjer unn Serviette gefalle, die hawwe oogefonge ze brenne unn weil de Schorsch grad in die Stubb kumme iss hotter grad die Flasch Äbbelwoi uff den Deller geschitt.

Was war donn dess? hotter mich gonz entgeisdert gefroocht.

Ich saach: Schorsch, dess mett dem Solar-Ootrieb iss gut, du musst in den Adventskronz nor noch e Brems oibaue, dass er nitt so doorum rast, dass die Kerze fortfliehe.

De Schorsch hott gejommert: Wie soll ich donn e Brems oibaue?

Loss derr was oifalle, habb ich gesaat, jetz du awwer den Deller eweck unn butz de Äbbelwoi vom Disch. Wenns Kättche hoomkimmt iss sunnst was los.

Ach, sät de Schorsch, jetz esse merr erst emol die Plätzjer, oogebrennt unn mett Äbbelwoi driwwer solle die gonz gut schmecke.

Eiern Honnes